

Komunikadu Imprensa
Tribunál Distritál Dili
11 Janeiru 2018

Tribunál kondena pena prizaun tinan haat bá arguidu iha krime abuzu seksuál ba ema ne'ebé labele reziste

JSMP: desizaun ne'e la ekilíbriu ho kondisaun lezada nu'udar ema ho difisiente

Iha 04 Janeiru 2018, Tribunál Distritál Dili kondena arguidu ba kazu abuzu seksuál ba ema ne'ebé labele reziste ho pena prizaun tinan 4. Tribunál konklui katak arguidu provadu komete krime hasoru vítima ne'ebé vulneravel ho kondisaun defisiénsia fízika iha liman no ain inklui labele koalia.

“JSMP hanoin katak tuir loloos arguidu tenke hetan sentensa ne'ebé todan liu tanba vítima nu'udar ema ne'ebé vulneravel ho kondisaun inkapaz,” dehan Diretor Ezekutivu JSMP Luis de Oliveira Sampaio”.

Ministériu Públiku akuza arguidu kontra artigu 179 Kódigu Penál kona-ba abuzu seksuál ba ema ne'ebé labele reziste hanesan ema inkonxiente ka inkapáz, vulneravel partikularmente tanba moras, defisiénsia fízika ka psíkika, tanba aproveita nia inkapasidade, sei hetan pena prizaun tinan 4 to'o tinan 12.

Pena tinan 4 prizaun reprezenta deit sentensa mínimu hosi pena abstratu ne'ebé hatuur iha artigu 179 Kódigu Penál no pena ne'e la reflete kondisaun vulnerabilidade lezada nian hanesan ema ho difisiente. Desizaun ne'e la proteze lezada no sei loke dalan ba ema seluk atu kontinua viola ema ho difisiente sira seluk iha futuru. Tuir loloos, Tribunál tenke halo desizaun ida-ne'e forte no todan ba arguidu atu prevene krime similar seluk akontese iha futuru.

JSMP enkoraja Tribunál atu konsidera sirkunstânsia relevante sira hosi lezada nia kondisaun fízika no sosiál antes foti desizaun ruma. Iha kazu sira hanesan ne'e, importante teb-tebes atu inklui indemnizasaun ba lezada.

Tribunál prova katak arguidu servisu nu'udar bidaen iha lezada nia uma. Iha 28 Fevereiro 2017, iha tuku 21 :30 kalan, lezada ne'ebé ho tinan 17 no nia inan tuur hela iha veranda. Arguidu ba rasta lezada dehan atu ba axiste televizaun. Hein kleur, lezada nia maun (HdS) sai ba liur no hare arguidu halo hela relasaun seksuál ho lezada iha du'ut laran.

Tribunal mós prova katak, iha momentu arguidu komete aktus ne'e, arguidu ho kondisaun lanu todan tanba hemu tua habok butir 2, bir bintang kalen 12, tua sabu aqua boot ida, no tiner ne'ebé kahur ona ho tua sabu. Mesmu arguidu lanu todan Tribunál konsidera arguidu sei bele hatene-an.

Tribunál prova bazeia ba deklarasaun testemuña nu'udar arguidu nia inan, maun no arguidu rasik ne'ebé konfesa katak nia komete duni maibé ho kondisaun lanu todan.

Iha alegasaun finál Prokuradór husu ba Tribunál atu kondena arguidu ho pena prizaun tinan 7 maske arguidu arrepende, no la hatene saida mak nia halo tanba hemu tua barak no influénsia ho alkol barak. Entretantu Defeza husu atu Tribunál absolve arguidu tanba arguidu lanu todan no la hatene saida mak nia halo.

Kazu ne'e rejistru iha Tribunál ho Nú. Prosesu: 0048/17.ERSIC, no julgamentu ne'e prezide hosi Dra. Jacinta Correia (reprezenta juis koletivu). Enkuantu Ministériu Públiku reprezenta husi Dr. Alfonso Lopes no arguidu hetan defeza hosi Dr. João Hendrique de Carvalho hosi Defensória Públiku.

Atu hetan informasaun liutan bele kontaktu ba:

Luis de Oliveira Sampaio
Diretor Ezekutivu JSMP
E-mail: luis@jsmp.tl